

Na osnovu člana 101. stav 2. Zakona o notarima Brčko distrikta BiH («Službeni glasnik Brčko distrikta BiH broj 9/03 od 20.06.2003.godine, Pravosudna komisija Brčko distrikta BiH, na 78-oj sjednici održanoj 12.11.2007.godine, utvrđuje slijedeću

PRIVREMENU TARIFU

O NAGRADAMA I NAKNADAMA NOTARA U BRČKO DISTRIKTU BIH

A – OPŠTI DIO

Član 1. Predmet tarife

Ovom privremenom Tarifom o nagradama i naknadama notara (u daljem tekstu: Tarifa) propisuje se način vrednovanja notarskog posla i obračunavanje nagrade za rad notara i naknade troškova notara u vezi sa obavljenim radom. Prema ovoj Tarifi vrednuju se poslovi propisani Zakonom o notarima Brčko distrikta BiH.

Član 2. Notarska nagrada i naknade

- (1) Notaru pripada pravo na nagradu za svoj rad i naknadu troškova u vezi sa obavljenim radom u visini i na način regulisan ovom Tarifom.
- (2) U nagradi za notarski posao iz prethodnog stava ovog člana vrednovani su pripremni poslovi, koji su povezani sa notarskim poslom (savjetovanja sa strankom i drugim učesnicima u poslu, sastav, čitanje i obrazloženje notarske isprave).

Član 3. Ekonomski najpovoljniji način postupanja

Prilikom obavljanja notarske djelatnosti notar je dužan postupati na način koji je ekonomski najpovoljniji za stranke, osim ako stranke, nakon odgovarajuće pouke notara, zahtijevaju da se drugačije postupi.

Član 4. **Povećanje nagrade**

- (1) Za posao koji notar na zahtjev stranke ili iz opravdanih razloga obavi izvan radnog vremena propisanog odlukom nadležnog organa ili neradnim danima nagrada se povećava za 25%, s tim da povećanje ne može biti manje od 25 bodova.
- (2) Za posao koji na zahtjev stranke obavi izvan notarskog ureda, notar će obračunati dodatnu nagradu zbog izbivanja iz ureda u visini od 50 bodova za svaki započeti sat izbivanja iz ureda, ukoliko drugačije nije određeno ovom Tarifom.
- (3) Ako notar posao poduzima izvan radnog vremena i izvan ureda, obračunat će obje nagrade prema stavu 1. i 2. ovog člana.
- (4) Ako se kod pravnih poslova, čiji je predmet prijenos ili sticanje vlasništva ili drugih stvarnih prava na nekretninama kao i zaključivanje pravnih poslova iz oblasti prava privrednih društava, na traženje stranaka notar angažuje radi izvršenja (upisa) tog posla u javnim registrima (a što uključuje sastavljanje prijedloga odnosno prijave za upis i podnošenje registru prijedloga odnosno prijave za upis) notar će obračunati dodatnu nagradu za tu aktivnost u visini 25% nagrade koja se plaća za notarsku obradu tog posla, s tim što kod upisa pravnog posla u zemljišne knjige dodatna nagrada ne može biti manja od 100 bodova, a kod upisa pravnog posla iz oblasti prava privrednih društava u registar dodatna nagrada ne može biti manja od 200 bodova.
- (5) Ako u sastavljanju notarski obrađene isprave sudjeluju više od dvije stranke, notar će obračunati dodatnu nagradu za treću i svaku narednu stranku u visini od 10% pune nagrade po jednoj stranci, ali najviše 50% pune nagrade.
- (6) Ako u sastavljanju notarski obrađene isprave sudjeluju pozvani svjedoci ili tumači, notar će obračunati na dodatnu nagradu od 10 bodova po svakom svjedoku i 25 bodova po svakom tumaču.
- (7) Za notarsku obradu svih pravnih poslova kod koji sudjeluje pravna osoba ili poduzetnik, odredit će se dodatna nagrada u visini od 30 bodova po svakoj takvoj stranci.

Član 5. **Naknada troškova**

- (1) Stranka je dužna notar nadoknaditi sudske i upravne takse, nagrade za vještačenje, procjene, izdatke za čuvanje stvari, te sve druge nužne troškove vezane za obavljanje notarskih poslova.
- (2) Stranka je dužna nadoknaditi notar izdatke za PTT usluge, obrasce, bankovne poslove uključujući i troškove povjereničkog računa, fotokopiranje dokumentacije i druge izdatke. Te izdatke notar obračunava samo u stvarnoj visini.

- (3) Notar ima pravo na naknadu troškova prijevoza, ako su ti troškovi povezani sa obavljanjem notarskih poslova. Troškovi prijevoza pripadaju notar u visini cijene avionske karte ili drugog prijevoznog sredstva koje koristi. Za upotrebu vlastitog automobila, notar pripada naknada od 35% važeće cijene benzina za 1 litar za svaki pređeni kilometar.
- (4) Ako mora ostati na putu izvan službenog sjedišta duže od jednog dana ili mora prenoćiti u hotelu, notar ima pravo na naplatu dnevnice i troškova hotelskog smještaja, osim u hotelu „L“ kategorije. Dnevnicu se obračunava u visini dnevnice sudije Apelacionog suda na području gdje se nalazi notarski ured.

Član 6. Osnovi za određivanje nagrade

Nagrade za notarski posao po ovoj Tarifi određuju se:

- prema vrijednosti predmeta,
- prema utrošenom vremenu,
- u stalnom iznosu.

Član 7. Određivanje nagrade prema vrijednosti predmeta

- (1) Za obradu notarskih isprava i za obavljanje drugih notarskih poslova, kod kojih je vrijednost predmeta poznata ili se može utvrditi, nagrada se određuje prema vrijednosti predmeta na koji se posao odnosi. Za određivanje vrijednosti mjerodavno je vrijeme poduzimanja notarskog posla.
- (2) Osnov za određivanje nagrade je stvarna prometna vrijednost stvari, koja je predmet notarske isprave bez odbitaka dugova.
- (3) Ako je predmet pravnog posla potraživanje, uzima se samo glavno potraživanje bez sporednih potraživanja, kao što su kamata, ugovorna kazna, troškovi postupka i sl. Kod pravnih poslova o zasnivanju hipoteke kao osnova za određivanje nagrade uzima se iznos tražbine koja se osigurava bez sporednih tražbina kao što su kamata, troškovi postupka i sl.
- (4) Izuzetno, notar može odrediti tržišnu vrijednost bez obzira na vrijednost koju stranka ili drugi učesnici u poslu navedu kao vrijednost pravnog posla, ako tako navedena vrijednost ne odgovara prometnoj vrijednosti. Pri tome notar mora uzeti u obzir vrijednost stvari koja se postiže u uobičajenom pravnom prometu uzimajući u obzir svojstva stvari i službeno poznate činjenice kao što su procjene nadležnog poreskog organa za tu ili slične stvari na tom području, podatke drugih organa uprave, cijene koje se za slične stvari postižu na javnoj licitaciji i sl.
- (5) Kod podjele zajedničke imovine, ugovora o diobi ili zamjeni i kod sličnih pravnih poslova kao osnova za određivanje nagrade uzima se vrijednost ukupne imovine koja je predmet pravnog posla.

- (6) Za sastavljanje notarskih isprava o privrednim ugovorima osnova za određivanje nagrade je vrijednost predmeta određena u ugovoru.
- (7) Za sastavljanje akata o osnivanju društva i drugih pravnih lica, te za potvrđivanje odluka organa upravljanja, osnova za određivanje nagrade je vrijednost osnovnog kapitala, a kod izmjene osnovnog kapitala vrijednost izmijenjenog osnovnog kapitala.
- (8) Kod prijenosa udjela u privrednom društvu mjerodavna je vrijednost prenesenog udjela ako je viša od protučinidbe, a ako je niža, mjerodavna je vrijednost protučinidbe.
- (9) Kod ugovora o spajanju ili pripajanju privrednih društava, osnova za određivanje nagrade je ukupna vrijednost osnovnog kapitala svih društava.
- (10) Ako su predmet pravnog posla vrijednosni papiri koji kotiraju na berzi, osnova za određivanje nagrade izračunava se po berznom kursu važećem na dan prije sklapanja pravnog posla.
- (11) Notarski poslovi koji nisu opisani u posebnom dijelu ove Tarife vrednuju se uspoređivanjem sličnih poslova čija je vrijednost ocijenjena u posebnom dijelu Tarife. Pri vrednovanju uzimaju se u obzir tarifne stavke za slične radnje i utrošeno vrijeme, te odredbe opšteg dijela Tarife.

Član 8.

Određivanje nagrade prema utrošenom vremenu

- (1) Kada se nagrada za obavljeni notarski posao ne može odrediti prema vrijednosti predmeta niti u stalnom iznosu, odredit će se prema utrošenom vremenu.
- (2) Pri određivanju vremena potrebnog za pojedinačni notarski posao, pored vremena koje je potrebno za sastavljanje notarske isprave ili za drugi notarski posao, uzima se u obzir i vrijeme koje je notar utrošio za savjetovanje sa strankom i drugim učesnicima, vrijeme za druge pripremne poslove notara i vrijeme odsustvovanja iz ureda, ako se posao obavlja izvan notarskog ureda.

Član 9.

Sistem bodovanja za određivanje nagrade prema vrijednosti predmeta

- (1) Vrijednost predmeta i nagrada za notarski posao sa brojem bodova, nalazi se u posebnom dijelu Tarife i čini njen sastavni dio.
- (2) Nagrada za obavljeni posao notara određuje se tako što se zbir bodova za pojedini notarski posao pomnoži sa vrijednošću boda.
- (3) Vrijednost boda bez poreza na dodanu vrijednost iznosi 0,50 (slovima: nula/pedeset) KM.
- (4) Pored nagrade za obavljeni posao, notar je dužan da obračuna strankama i porez na dodanu vrijednost, osim ukoliko u zakonom predviđenim slučajevima ne postoji obaveza plaćanja ovog poreza.

Član 10. **Ništavost dogovora**

Dogovor o visini nagrade koji bi notar sklopio u suprotnosti sa odredbama ove Tarife je ništav, a notar čini povredu službene dužnosti iz člana 94 st. 1. tač. 3. Zakona o notarima Brčko distrikta BiH.

Član 11. **Nezavršen posao i davanje savjeta**

- (1) Ako notar na traženje stranke sačini nacrt neke isprave, a taj nacrt se ne pretvori u notarski obrađenu ispravu, notaru pripada 50% nagrade predviđene za notarsku obradu.
- (2) Ako stranka za vrijeme dogovora o izradi notarske isprave odustane, notaru pripada nagrada u iznosu od 50% nagrade predviđene za notarsku obradu.
- (3) Notar nema pravo na nagradu za savjete koje daje u pripremi ili u vezi sa glavnim poslom za koji naplaćuje nagradu.
- (4) Notar ima pravo na nagradu za savjete koje daje na zahtjev stranaka u svim drugim slučajevima mimo stava 3. ovog člana i to u visini od 30 do 300 bodova, u zavisnosti od vrijednosti predmeta kojeg se savjetovanje tiče, potrošenog vremena i mjesta gdje je radnja poduzeta.
- (5) Ako notar u roku od godinu dana izvrši obradu isprave na osnovu nacrtu koji je on sačinio prema stavu 1. i 2. ovog člana ili ako na osnovu savjetovanja prema stavu 4. ovog člana izvrši notarsku obradu isprave u nagradu za notarsku obradu isprave se uračunava (odbija) nagrada plaćena za izradu nacrtu odnosno savjetovanja.

Član 12. **Nevažeće i neupotrebljive isprave**

Za notarsku ispravu za koju se utvrdi da je zbog greške u obliku ili krivicom notara nevažeća, a prepisi, potvrde i ovjere neupotrebljivi zbog formalnih nedostataka za koje je odgovoran notar, nagrada se ne plaća, a već plaćenu nagradu notar je dužan vratiti.

Član 13. **Dužnost plaćanja nagrade**

Ako je više stranaka učestvovalo u sklapanju pravnog posla pred notarom ili je notar izvršio jednu radnju za više stranaka, sve te stranke solidarno duguju nagradu i naknadu troškova notaru, ako se stranke drugačije ne dogovore.

Član 14.
Plaćanje nagrade i akontacije

- (1) Notar ima pravo na nagradu neposredno nakon obavljenog posla.
- (2) Obveznik plaćanja notarskog posla dužan je plaćati notaru uslugu prema Tarifi koja je na snazi u vrijeme kada je notar posao obavio, pri čemu se uzima u obzir vrijednost boda, koja važi u vrijeme kada je posao plaćen.
- (3) Notar može zahtijevati da mu stranka kod narudžbe posla plati odgovarajuću akontaciju za potrebne izdatke i troškove, te za nagradu u iznosu do 50% očekivane nagrade.
- (4) Ako akontacija nije plaćena odmah ili u roku koji odredi notar, notar je dužan obaviti posao tek nakon prijema akontacije.

Član 15.
Sudjelovanje svjedoka i sudskog tumača

Učesnici pravnog posla dužni su platiti i troškove svjedoka i sudskog tumača, te nagradu koja pripada sudskom tumaču.

Član 16.
Predaja dokumentacije i obračun

- (1) Notar je dužan predati stranci ili drugim učesnicima notarsku ispravu odnosno prepise, potvrde, ovjere, te ostale isprave namijenjene strankama i učesnicima tek nakon što su troškovi, izdaci i nagrade plaćeni u cijelosti.
- (2) Notar je obavezan stranci izdati specifikovanu potvrdu o plaćenoj nagradi i naknadi troškova.

Član 17.
Izmirenje spora mirnim putem

Ako stranka nije saglasna sa nagradom i naknadom troškova koje je odredio notar, ona ili notar mogu zahtijevati rješavanje spora mirnim putem od nadležnog organa Notarske komore.

Član 18.
Vremensko važenje tarife

Ova privremena Tarifa o nagradama i naknadama notara ostaje na snazi dok ne stupi na snagu Tarifa o nagradama i naknadama notara, s tim da će Pravosudna komisija Brčko

distrikta BiH u skladu sa odredbama Zakona o notarima Brčko distrikta BiH u roku od tri mjeseca od dana stupanju na snagu ove privremene Tarife donijeti Tarifu o nagradama i naknadama notara Brčko distrikta BiH.

Član 19.
Stupanje na snagu

Ova privremena Tarifa o nagradama i naknadama notara stupa na snagu narednog dana od dana objavljivanja u „Službenom glasniku Brčko distrikta BiH“.

B – POSEBNI DIO

T A R I F A
Nagrada prema vrijednosti predmeta notarskih isprava
Tarifni broj 1.

(1) Za sastavljanje notarske isprave, koja ne spada u Tarifni broj 2. do Tarifnog broja 17, nagrada s obzirom na vrijednost predmeta iznosi:

Vrijednost predmeta Od KM	do KM	Nagrada bodova
0	1.000,00	120
1.001,00	2.500,00	180
2.501,00	5.000,00	250
5.001,00	10.000,00	300
10.001,00	20.000,00	400
20.001,00	30.000,00	500
30.001,00	40.000,00	550
40.001,00	50.000,00	600
50.001,00	60.000,00	650
60.001,00	80.000,00	700
80.001,00	100.000,00	750
100.001,00	150.000,00	850
150.001,00	200.000,00	900
200.001,00	250.000,00	1.000
250.001,00	300.000,00	1.200
300.001,00	400.000,00	1.400
400.001,00	500.000,00	1.600
500.001,00	750.000,00	2.000
750.001,00	1.000.000,00	2.500

- (2) Pri vrijednosti predmeta preko 1.000.000,00 KM, za svakih započelih 100.000,00 KM nagrada se povećava za 100 bodova, ali najviše može iznositi 4.000 bodova.

Tarifni broj 2.
Buduće činidbe i ugovori o zakupu

- (1) Za notarsku obradu isprave koja za predmet ima pravo na buduće činidbe (davanja) koje se ponavljaju, nagrada notara odmjerava se prema vrijednosti svih činidbi za vrijeme ukupnog ugovornog razdoblja, ali najviše do iznosa koji odgovara zbiru vrijednosti tih činidbi za vrijeme od pet godina.
- (2) Za notarski obrađenu ispravu ugovora o zakupu odredit će se nagrada prema vrijednosti zakupnine za dogovoreni period, ali najviše za period od tri godine, a kod ugovora o zakupu ili podzakupu koji se odnose na stambene prostorije, za period najviše od jedne godine. Nagrada se obračunava po Tarifnom broju 1., ali najviše 500 bodova.

Tarifni broj 3.
**Testament, zavještanje, punomoć, jednostrane izjave volje
u vezi sa stvarnim pravima, ugovori o otkupu stanova
na kojima postoji stanarsko pravo, predugovori i aneksi ugovora**

- (1) Za notarsku obradu testamenta ili zavještanja odredit će se 50% nagrade po Tarifnom broju 1, ali najmanje 300, a najviše 600 bodova.
- (2) Za notarsku obradu punomoći i za jednostrane izjave u pogledu stvarnih prava na nekretninama, osim založnih izjava (dozvole knjiženja, brisovne dozvole i sl.) odredit će se 25% nagrade po Tarifnom broju 1, ali najmanje 50, a najviše 150 bodova.
- (3) Za notarsku obradu založne izjave odredit će se 80% nagrade po Tarifnom broju 1, ali najmanje 200 bodova.
- (4) Za notarsku obradu ugovora o otkupu stanova na kojima postoji stanarsko pravo odredit će se 50% nagrade po Tarifnom broju 1, ali najmanje 200 bodova, a najviše 600 bodova.
- (5) Za notarsku obradu predugovora odredit će se 50% nagrade po Tarifnom broju 1, ali najmanje 120 bodova, a najviše 1000 bodova.
- (6) Za notarsku obradu aneksa odredit će se 50% nagrade po Tarifnom broju 1 ali najmanje 120 bodova, a najviše 600 bodova

Tarifni broj 4.
Bračni ugovori i porodičnopravni poslovi

- (1) Na notarski obrađenu ispravu bračnog ugovora odredit će se nagrada prema vrijednosti imovine obilju ugovornih strana koja je predmet ugovora. Nagrada se obračunava po Tarifnom broju 1., ali ne manje od 300 bodova.
- (2) Ako se kod bračnog ugovora ne može odrediti nagrada prema vrijednosti, notar ima pravo na nagradu prema utrošenom vremenu, ali ne manje od 300, a ne više od 500 bodova.
- (3) Za notarsku obradu izjave o priznanju materinstva ili očinstva i o pristanku majke na priznanje očinstva notar ima pravo na nagradu u visini od 200 bodova.
- (4) Za notarsku obradu sporazuma roditelja o visini odnosno povišenju doprinosa za izdržavanje djeteta odredit će se nagrada prema vrijednosti jednogodišnjeg iznosa doprinosa za izdržavanje. Nagrada se obračunava po Tarifnom broju 1., ali ne manje od 150 i ne više od 300 bodova.

Tarifni broj 5.
Nasljednopravni poslovi

- (1) Za notarsku obradu ugovora o raspolaganju za slučaj smrti nagrada se određuje prema vrijednosti imovine ostavitelja koja je predmet raspolaganja. Nagrada se obračunava prema Tarifnom broju 1., ali ne manje od 300 bodova.
- (2) Za notarsku obradu isprave o ustupanju i raspodjeli imovine za života nagrada se određuje prema vrijednosti ukupne imovine koja se ustupa i raspodjeljuje. Nagrada se obračunava prema Tarifnom broju 1., ali ne manje od 300 i ne više od 2.500 bodova.
- (3) Za notarsku obradu sporazuma o odricanju od nasljedstva nagrada se određuje prema vrijednosti nasljednog dijela za koji se vrši odricanje i obračunava se prema Tarifnom broju 1., ali ne manje od 200 i ne više od 600 bodova.
- (4) Za notarsku obradu isprave o primanju nasljeđa ili odricanju nasljeđa nagrada se određuje u iznosu od 60 bodova.
- (5) Za povjereni posao popisa i procjene imovine u ostavinskom postupku nagrada se određuje prema ukupnoj vrijednosti te imovine i obračunava prema Tarifnom broju 1., ali ne manje od 300 bodova, a ne više od 600 bodova.

Tarifni broj 6.
Privredni ugovori

- (1) Za notarske obrade privrednih ugovora i drugih ugovora odredit će se nagrada po Tarifnom broju 1.

- (2) Za notarsku obradu privrednih ugovora, kod kojih se vrijednost ne može utvrditi, nagrada se utvrđuje prema utrošenom vremenu, ali ne manje od **250**, a ne više od 2.500 bodova.

Tarifni broj 7.
Privredna društva

- (1) Za notarsku obradu osnivačkih akata privrednih društava odredit će se nagrada po Tarifnom broju 1. ali najmanje 600 bodova. Za potvrdu statuta privrednih društava odredit će se nagrada po Tarifnom broju 1., ali najmanje 350, a najviše 700 bodova.
- (2) Za saradnju notara kod notarskih poslova za društva i druga pravna lica odredit će se nagrada s obzirom na vrijednost osnovnog kapitala društva, i to:

1. za prisustvovanje na skupštini dioničkog društva ili drugog organizacionog oblika, uključujući sastavljanje notarskog zapisnika, nagrada iznosi:

- pri vrijednosti osnovnog kapitala do 10.000,00 KM.....400 bodova
- pri vrijednosti osnovnog kapitala od 10.001,00 KM do 500.000,00 KM 600 bodova
- pri vrijednosti osnovnog kapitala od 50.001,00 KM do 500.000,00 KM 1.200 bodova
- pri vrijednosti osnovnog kapitala preko 501.000 KM do 2.000.000 KM2.000 bodova
- pri vrijednosti osnovnog kapitala preko 2.000.000 KM 2.500 bodova

Ako notar prisustvuje Skupštini duže od tri sata pripada mu dodatna nagrada za svaki započeti sat po 75 bodova.

2. za sastavljanje zapisnika kojim notar potvrđuje odluke drugih organa društva osim skupštine ili odluke jednočlanog privrednog društva (osim dioničkog društva) po Tarifnom broju 1., ali najmanje 200, a najviše 400 bodova,
3. za sastavljanje svake notarski obrađene isprave u postupku o podjeli, pripajanju ili spajanju društva, nagrada se određuje po Tarifnom broju 1., ali najmanje 400, a najviše 1000 bodova,
4. za notarsku obradu isprave kojom se mijenjaju članski udjeli, kao i za notarsku obradu isprave o istupanju odnosno pristupanju člana društva, nagrada se određuje po Tarifnom broju 1., ali najmanje 300 bodova, a najviše 2.000 bodova.
5. za notarsku obradu izmjena osnivačkih akata kojima se vrše ostale promjene predmeta upisa nagrada se određuje po tarifnom broju 1. ali ne manje od 300, a ne više od 600 bodova.

6. Za notarsku obradu akata o osnivanju podružnica i njihovih izmjena nagrada se određuje po Tarifnom broju 1., ali ne manje od 350. a ne više od 600 bodova.

Tarifni broj 8.
Ovjera fotokopija i prepisa

- (1) Nagrada notara za svaku ovjeru fotokopije dokumenta iznosi od 6 bodova za jednu stranu, a za svaku slijedeću stranu, notar će obračunati dopunsku nagradu od po 3 boda.
- (2) Za svaku ovjeru prepisa nagrada iznosi 6 bodova za jednu stranu, a za svaku slijedeću stranu, notar će obračunati dopunsku nagradu od po 3 boda.

Tarifni broj 9.
Ovjera izvoda iz trgovačkih i poslovnih knjiga

Ovjera izvoda iz trgovačkih, poslovnih i drugih javnih registara naplaćuje se 10 bodova po stranici.

Tarifni broj 10.
Ovjera potpisa

- (1) Za ovjeru potpisa na najviše dva primjerka istovjetne isprave, odredit će se nagrada od 7 bodova po svakom potpisu, a za ovjeru potpisa na svakom slijedećem primjerku te iste isprave, notar će obračunati dopunsku nagradu od po 3 boda po svakom potpisu.
- (2) Ako pri ovjeri potpisa učestvuju i svjedoci, obračunat će se dopunska nagrada od 7 bodova za svakog svjedoka.
- (3) Notar ima pravo na dopunsku nagradu od 7 bodova ako pri ovjeri učestvuje tumač ili prevodilac.
- (4) Ako je stranka slijepa ili nepismena, notar za čitanje isprave ima pravo na dopunsku nagradu od 12 bodova, a za svaku narednu stranicu po 4 boda.
- (5) Ako se ovjerava potpis lica kao zastupnika pravnog lica, notar ima pravo na dopunsku nagradu od 7 bodova po svakom takvom potpisu.

Tarifni broj 11.
Potvrda o vremenu kada je pismeno predočeno

- (1) Za potvrdu o vremenu kada mu je pismeno predočeno, odredit će se nagrada od 10 bodova.
- (2) Ukoliko stranka zahtijeva da notar utvrdi identitet lica koje je pismeno predočilo i lica kojem je pismeno predočeno, notar će obračunati dopunsku nagradu od 20 bodova.

Tarifni broj 12.
Potvrda o životu nekog lica

Za potvrdu o životu nekog lica, odredit će se nagrada od 50 bodova.

Tarifni broj 13.
Potvrde o činjenicama iz javnog registra

- (1) Za izdavanje potvrde o činjenicama iz javnih registara notar ima pravo na nagradu od 50 bodova kada tu potvrdu notar izdaje na osnovu uvida u ovjereni izvod iz javnog registra koji mu je stranka predočila.
- (2) Za radnje iz prethodnog stava notaru pripada nagrada od 150 bodova ako je za izdavanje potvrde izvršio uvid u javni registar, s tim da notar ima pravo na uvećanje te nagrade od 25 bodova za svaku slijedeću činjenicu (pod činjenicama se podrazumijeva vrsta upisanih podataka u odgovarajući javni registar), ali najviše 500 bodova.

Tarifni broj 14.
Potvrda drugih činjenica

- (1) Za potvrđivanje drugih činjenica odredit će se nagrada od 150 bodova, uvećana za utrošeno vrijeme njegovog prisustva preko dva sata i to za svaki započeti sat po 75 bodova.
- (2) U slučaju da se posao iz stava 1. ovog Tarifnog broja vrši izvan notarskog ureda odredit će se dodatno uvećanje nagrade iz stava 1. ovog Tarifnog broja po 75 bodova za svaki započeti sat izbivanja iz notarskog ureda.

Tarifni broj 15.
**Preuzimanje, čuvanje i predaja novca,
vrijednosnih papira i isprava**

- (1) Za preuzimanje, čuvanje i predaju novca i vrijednosnih papira nagrada iznosi prema vrijednosti:
 1. do 3.000,00 KM - nagrada 100 bodova
 2. preko 3.000,00 KM do 10.000,00 KM – nagrada za svakih započelih 1.000 KM 10 bodova više,
 3. preko 10.000,00 KM do 100.000,00KM – nagrada za svakih daljnjih 10.000 KM 10 bodova više,
 4. preko 100.000,00 KM za svakih daljnjih 50.000,00 KM - nagrada 15 bodova više, ali ne više od 500 bodova.

- (2) Za preuzimanje isprava na čuvanje i sastavljanje notarskog zapisnika o preuzimanju isprave notaru pripada nagrada u iznosu od 100 bodova za jednu ispravu i po 50 bodova za svaku narednu ispravu.

Tarifni broj 16.

Zemljišnoknjižni prijedlozi i sačinjavanje prijave za upis u registar poslovnih subjekata

- (1) Nagrada za sastavljanje zemljišnoknjižnog prijedloga iznosi 25% nagrade prema Tarifnom broju 1., ali najmanje 50, a najviše 200 bodova.
- (2) Nagrada za sastavljanje prijave za upis osnivanja privrednih društava u registar poslovnih subjekata bez podnošenja iste registru na upis iznosi 25% nagrade prema Tarifnom broju 1., ali najmanje 300 a najviše 500 bodova.
- (3) Nagrada za sastavljanje prijave za upis promjene podataka bitnih za pravni promet u registar poslovnih subjekata iznosi 25% nagrade prema Tarifnom broju 1., ali najmanje 100, a najviše 300 bodova.

Tarifni broj 17.

Nagrade određene prema utrošenom vremenu

Nagrada prema utrošenom vremenu ako šta drugo ovom Tarifom nije određeno iznosi 75 bodova za svaki započeti sat rada i odredit će se:

1. za sastavljanje isprava, ako se vrijednost može odrediti,
2. za notarske poslove, ako ih nije moguće ocijeniti prema drugim tarifnim stavkama,
3. za pribavljanje raznih odobrenja saglasnosti, uvjerenja, izvoda iz javnih registara i sl.

Tarifni broj 18.

Nagrade u stalnom iznosu

Nagrade u stalnom iznosu odredit će se za slijedeće notarske poslove:

1. za izdavanje ponovnog prepisa notarske isprave 50 bodova,
2. za dozvolu da se izvrši uvid u izvornik notarske isprave 50 bodova,
3. za izdavanje potvrde o postojanju izvornika notarske isprave 50 bodova,
4. za izdavanje ponovnog otpravka izvornika u svrhu izvršenja 200 bodova.

Tarifni broj 19
Klauzula o izvršnosti

- (1) Za izdavanje potvrde strankama o izvršnosti notarski obrađene isprave odredit će se nagrada od 75 bodova.
- (2) Ukoliko se u skladu sa notarski obrađenom ispravom vrši provjera ispunjenja uslova za davanje klauzule izvršnosti, nagrada iznosi 150 bodova.

Tarifni broj 20.
Naknada kancelarijskih troškova

Za izradu otpravaka, ovjerenih prepisa i prepisa notarskog izvornika, te ovjerenih prepisa drugih notarskih isprava, koje je istovremeno sa ispravom izdao notar, kao i za izradu fotokopija i prepisa drugih dokumenata, naknada iznosi za svaku stranu 1 bod.

Broj: SuPK-1580/07
Brčko, 12.11.2007.godine.

PREDSJEDNIK
PRAVOSUDNE KOMISIJE

NADA MAJINOVIĆ